

Communicaziun a las medias

Berna, ils 20 da favrer 2023

Culinarica grischuna per l'avertura da la terza Emna rumantscha

Oz ha cumenzà la terza emna internaziunala da la lingua rumantscha (Emna rumantscha), ina iniziativa cuminaivla dal DFAE sco er dal chantun Grischun e da la Lia Rumantscha. Il program da quest onn cumpiglia tranter auter in workshop da cuschinar a Berna, quai en preschientscha dal cusseglier federal Ignazio Cassis, dal president dal Cussegl naziunal, Martin Candinas e d'autras persunas da renum. Plinavant han lieu ina sairada tematica a Londra e curs da lingua a New York. La finamira èsi da far enconuschenta la varietad linguistica da la Svizra er a l'exteriur.

L'Emna rumantscha che vegn organisada mintga onn betg mo a Berna, mabain er en las represchentanzas svizras a l'exteriur, è per il DFAE in'ocasiun da far enconuschenta la diversidad da la Svizra er a l'exteriur. «Il 2022 m'han duas classas da scola da Savognin e da Scuol, che han visità Berna, purtà bleras ideas per promover la lingua e cultura rumantscha. Ellas han mussà, che nossa diversidad po esser la funtauna d'ideas innovativas. Ensemen cun nossas represchentanzas a l'exteriur avain nus vulì resguardar quest onn spezialmain ina idea», declera il cusseglier federal Ignazio Cassis. Uschia va il workshop da cuschinar, ch'è vegnì organisà en collavuraziun cun il chantun Grischun e cun la Lia Rumantscha per cumenzar la terza Emna rumantscha en Svizra ed a l'exteriur, enavos sin ina proposta dals giuvenils rumantschs.

Cultura rumantscha – d'ina cuschina a Berna ora en il mund

L'invitaziun al workshop da cuschinar sut la batgetta dal cuschinier grischun Andreas Baselgia han acceptà represchentantas e represchentants da las ambassadas svizras en l'Italia, en Frantscha, en Belgia ed en la Gronda Britannia sco er las ambassaduras da la Spagna e da l'Austria en Svizra. Tras questa occurrenza duai la savida davart la cultura rumantscha vegnir intermediada e transferida en las represchentanzas respectivas.

Il workshop ha gi lieu en preschientscha dal cusseglier federal Ignazio Cassis, dal president dal Cussegl naziunal Martin Candinas e dal cusseglier guvernativ Jon Domenic Parolini.

L'ambassada svizra en la Gronda Britannia vegn a repretter il tema cun ina «saira rumantscha», ch'ella organisescha ils 27 da favrer 2023 en il rom da la «Wales

Week» (emna da Wales) a Londra. Cun spaisas tradiziunalas e cun infurmaziuns davart la lingua e la cultura rumantscha vegn ella a colliar la diversidad da la Svizra cun il mantegniment dal patrimoni cultural valisic en la Gronda Britannia.

Curs da rumantsch a New York

Er autras represchentanzas a l'exteriur mainan tras occurrenzas per promover la lingua e cultura rumantscha, en spezial en furma dad events e cuntegns digitalis. Il consulat general svizzer a New York organisescha l'emprim curs da rumantsch en l'istorgia da la citad. A Brooklyn dat Chasper Pult ina invista da la lingua rumantscha a las abitantas ed als abitants da quella part da la citad sco er ad ulteriuras personas interessadas. Ultra da quai pon ins degustar spezialitads da la Svizra. Plinavant mussa il consulat puspè ina retscha da videos da «crash curs» rumantschs ch'èn vegnids registrads en lieus iconics da la citad, sco per exempel en la metro, al Times Square, a la Wallstreet ed a la sedia da la ONU.

Il DFAE e la plurilinguitad

L'Emna rumantscha è in element d'ina retscha d'occurrenzas periodicas – sco il Di da la plurilinguitad, la Settimana della lingua italiana nel mondo, la Semaine de la francophonie e la Woche der deutschen Sprache – che suttastritgan l'impurtanza da la plurilinguitad per la coesiun naziunala, ma er l'avertura vers anora. La stima internaziunala per la diversidad da la Svizra è gronda.

La promoziun da las linguas minoritaras en Svizra è er ina part dal dialog politic structurà e cuntinuant ch'il schef dal DFAE maina cun ils chantuns Grischun e Tessin.

Links utils:

Fotografias e videos dal lavuratori chattais Vus sut il suandant link:

<https://share.dma.swiss/s/b6b2cHTrEdGKBaE>